

全唐诗卷八百三十五

卷 835_1

【蜀王入大慈寺听讲（天复三年作）】贯休

玉节金珂响似雷，水晶宫殿步裴回。
只缘支遁谈经妙，所以许询都讲来。
帝释镜中遥仰止，魔军殿上动崔嵬。
千重香拥龙鳞立，五种风生锦绣开。
宽似大溟生日月，秀如四岳出尘埃。
一条紫气随高步，九色仙花落古台。
谢太傅须同八凯，姚梁公可并三台。
登楼喜色禾将熟，望国诚明首不回。
驾驭英雄如赤子，雌黄贤哲贡琼瑰。
六条消息心常苦，一剑晶荧敌尽摧。
木铎声中天降福，景星光里地无灾。
百千民拥听经座，始见重天社稷才。

卷 835_2

【蜀王登福感寺塔三首】贯休

天资忠孝佐金轮，香火空王有宿因。
此世喜登金骨塔，前生应是育王身。
封疆岁暮笙歌合，襦袴正初锦绣新。
释子沾恩无以报，只擎章句贡平津。
似圣悲增道不穷，忧民忧国契尧聪。
两髯有雪丹霞外，万里无尘一望中。
南照微明连莽苍，峨嵋拥秀接崆峒。
林僧岁月知何幸，还似支公见谢公。
步步层层孰可陪，相轮边日照三台。
喜欢烝庶皆相逐，惆怅銮舆尚未回。
金铎撼风天乐近，仙花含露瑞烟开。
一年一度常如此，愿见文翁百度来。

卷 835_3

【少监三首】贯休

器琢仙珪美有馀，席珍国宝比难如。
衔花乳燕看调瑟，衣锦佳人侍读书。
荀氏门风龙变化，谢家庭树玉扶疏。
即期寰海隆平日，归佐吾皇侍玉除。
益友相随益自强，趋庭问礼日昭彰。
袍新宫锦千人目，马骏桃花一巷香。
偏爱曾颜终必及，或如韩白亦无妨。
八龙三虎森如也，万古千秋瑞圣唐。
具臣而微太少年，凤毛五色带非烟。
倚天长剑看无敌，绕树号猿已应弦。

接士开襟清圣熟，分题得句落花前。
即应出将传家法，圣泽恩波浩浩然。

卷 835_4

【再到钟陵作】贯休

六七年来到豫章，旧游知己半凋伤。
春风还有花千树，往事都如梦一常无限丘墟侵郭路，几多台榭浸湖光。
只应唯有西山色，依旧崔巍上寺墙。

卷 835_5

【经弟妹坟】贯休

泪不曾垂此日垂，山前弟妹冢离离。
年长于吾未得力，家贫抛尔去多时。
鸿冲□□霜中断，蕙杂黄蒿冢上衰。
恩爱苦情抛未得，不堪回首步迟迟。

卷 835_6

【到蜀与郑中丞相遇】贯休

深隐犹为未死灰，远寻知己遇三台。
如何麋鹿群中出，又见鸬鹚天上来。
剑阁霞粘残雪在，锦江香甚百花开。
谩期王谢来相访，不是支公出世才。

卷 835_7

【别冯使君】贯休

瓦砾文章岂有媒，两三年只在金台。
本师头白须归去，太守门清愿再来。
皓皓玉霜孤雁远，萧萧松岛片帆开。
从兹林下终无事，唯只焚香祝上台。

卷 835_8

【上新定宋使君】贯休

禅坐吟行谁与同，杉松共在寂寥中。
碧云诗里终难到，白藕花经讲始终。
水叠山层擎草疏，砧清月苦立霜风。
十年勤苦今酬了，得句桐江识谢公。

卷 835_9

【和李判官见新榜为兄下第】贯休

失意荆枝滴泪频，陟冈何翅不知春。
心中岐路平如砥，天上文章妙入神。
休说宋风回鹧首，即看雷火燎龙鳞。
从兹相次红霞里，留取方书与世人。

卷 835_10



【送罗邕赴许昌辟】贯休

方得论心又别离，黯然江上步迟迟。
不堪回首崎岖路，正是寒风敝错时。
美似郗超终有日，去依刘表更何疑。
前程不少南飞雁，聊寄新诗慰所思。

卷 835_11

【酬韦相公见寄】贯休

盐梅金鼎美调和，诗寄空林问讯多。
秦客弈棋抛已久，楞严禅髓更无过。
万般如幻希先觉，一丈临山且奈何。
空讽平津好珠玉，不知更得及门么。

卷 835_12

【酬张相公见寄】贯休

周郎怀抱好知音，常爱山僧物外心。
闭户不知芳草歇，无能唯拟住山深。
感通未合三生石，骚雅欢擎九转金。
但似前朝萧与蒋，老僧风雪亦相寻。

卷 835_13

【酬王相公见赠】贯休

孤拙将来岂偶然，不能为漏滴青莲。
一从麟笔题墙后，常只冥心古像前。
九德陶熔空有迹，六窗清净始通禅。
今朝幸捧琼瑶赠，始见玄中更有玄。

卷 835_14

【酬周相公见赠】贯休

三界无家是出家，岂宜拊凤睹新麻。
幸生白发逢今圣，曾梦青莲映玉沙。
境陟名山烹锦水，睡忘东白洞平茶。
喜擎绣段攀金鼎，谢朓馀霞始是霞。

卷 835_15

【道情偈三首】贯休

崆峒老人专一一，黄梅真叟却无无。
独坐松根石头上，四溟无限月轮孤。
非色非空非不空，空中真色不玲珑。
可怜卢大担柴者，拾得骊珠橐籥中。
优钵罗花万劫春，频犁田地绝纤尘。
道吾道者相招好，不是香林采叶人。

卷 835_16



【马上作】贯休

柳岸花堤夕照红，风清襟袖鬋璁珑。
行人莫讶频回首，家在凝岚一点中。

卷 835_17

【道中逢乞食老僧】贯休

赤棕桐笠眉毫垂，拄柺栗杖行迟迟。
时人只施盂中饭，心似白莲那得知。

卷 835_18

【秋末寄武昌一公】贯休

见说武昌江上住，柏枯槐朽战时风。
知师诗癖难医也，霜洒芦花明月中。

卷 835_19

【陋巷】贯休

坠叶如花欲满沟，破篱荒井一蝉幽。
亦知希骥无希者，作么令人强转头。

卷 835_20

【终南僧】贯休

声利掀天竟不闻，草衣木食度朝昏。
遥思山雪深一丈，时有仙人来打门。

卷 835_21

【听僧弹琴】贯休

家近吴王古战城，海风终日打墙声。
今朝乡思浑堆积，琴上闻师大蟹行。

卷 835_22

【渔者】贯休

风恶波狂身似闲，满头霜雪背青山。
相逢略问家何在，回指芦花满舍间。

卷 835_23

【大蜀皇帝潜龙日述圣德诗五首】贯休

岳渎殊祥日月精，入尧金镜佐休明。
衣严黼黻皇恩重，剑折芙蓉紫气横。
玉辇金汤山岳峻，花藏台榭管弦清。
已闻图上凌烟阁，宠渥穹窿玉不名。
扶持社稷似齐桓，百万雄师贵可观。
神智发中真莫测，贡输天下学应难，风清鼙角□□□，□肃神龙草木寒。
堪羨蜀民恒有福，太平时节一般般。
珠履三千侍玉除，宫花飘锦早莺初。



虽然周孔心相似，其奈龚黄政不如。
浩浩歌谣闻禁掖，重重襦袴满樵渔。
若论朝野艰难日，第一之功美有馀。
紫髯青眼代天才，韩白孙吴稍可陪。
只见赤心尧日下，岂知真气梵天来。
听经瑞雪时时落，登塔天花步步开。
尽祝庄椿同寿考，人间岁月岂能催。
丈夫勋业正乾坤，麟凤龟龙尽在门。
西伯最怜耕让畔，曹参空爱酒盈樽。
心慈为受金仙嘱，发白缘酬玉砌恩。
从此于门转高大，可怜子子与孙孙。

卷 835_24

【陈情献蜀皇帝】贯休

河北江东处处灾，唯闻全蜀勿尘埃。
一瓶一钵垂垂老，千水千山得得来，
奈苑幽栖多胜景，巴歛陈贡愧非才。
自惭林薮龙钟者，亦得亲登郭隗台。

卷 835_25

【寿春节进大蜀皇帝五首】贯休

上玄大帝降坤维，箕尾为臣副圣期。
岂比赤光盈室日，全同白象下天厨。
文经武纬包三古，日角龙颜遇四夷。
今日降神天上会，愿将天福比须弥。
异香滴露降纷纷，紫电环枢照禁门。
先冠百王临亿兆，后称十号震乾坤。
羲轩之道方为道，草木沾恩始是恩。
今以謏才歌睿德，犹如饮海妙难论。
茂祉遐宣胜事并，薰风微入舜弦清。
四洲不必归王化，一统那能计圣情。
合合鼓钟膏雨滴，峨峨宫阙瑞烟横。
西逾昆岳东连海，谁不梯山贺圣明。
远人玉帛尽来归，及物天慈物物肥。
春力遍时皆甲拆，王言闻者尽光辉。
家家锦绣香醪熟，处处笙歌乳燕飞。
为报蜀皇勤祷祝，圣明天子古今希。
积劫修来似炼金，为皇为帝万灵钦。
能当浊世为清世，始见君心是佛心。
九野黎民耕浩浩，百蛮朝骑日駸駸。
今朝献寿将何比，愿似庄椿一万寻。

卷 835_26

【对雪寄新定冯使君二首】贯休

仙掌空思归未能，焚香冥目对残灯。

岂知瑞雪千山合，空觉春寒半夜增。
翳月素云埋粉堞，堆巢孤鹤下金绳。
因思太守忧民切，吟对琼枝喜不胜。
政化由来通上灵，丰年祥瑞满窗明。
气严坐久灯凝焰，片大更深屋作声。
飘掩烟霞何处去，欹斜杉竹向帘倾。
雪林中客虽无事，还有新诗半夜成。

卷 835_27

【送刘相公朝覲二首】贯休

九苞仙瑞曜垂衣，一品高标百辟师。
魏相十思常自切，曹溪一句几生知。
久交玉帛虽难别，须佐金轮去已迟。
唯杜荆州最惆怅，柳门回首落花时。
急征只是再登庸，生意人心万国同。
燮理久征殷傅说，谭真欲过李玄通。
程穿岷首春光老，马速商於曙色红。
从此龙颜又应瘦，寰瀛俱荷代天功。

卷 835_28

【避寇游成福山院】贯休

成福僧留不拟归，猕猴菌嫩豆苗肥。
那堪蚕月偏多雨，况复衢城未解围。
翠拥槿篱泉乱入，云开花岛雉双飞。
堪嗟大似悠悠者，只向诗中话息机。

卷 835_29

【别李常侍】贯休

楚水和烟海浪通，又擎杯锡去山东。
道情虽拟攀孤鹤，诗业那堪至远公。
梦入深云香雨滴，吟搜残雪石林空。
朱门再到知何日，一片征帆万里风。

卷 835_30

【送郑阁赴闽辟】贯休

便便书腹德无邻，健笔从知又入闽。
鹦鹉才须归紫禁，真珠履不称清贫。
武夷山夹仙霞薄，螺女潭通海树春。
从此应多好消息，莫忘江上一闲人。

卷 835_31

【寄信州张使君】贯休

水坛怪殿地含烟，领鹤行吟积翠间。
数阁凉飈终日去，满怀明月上方还。
时来自有鸛鸾识，道在从如草木闲。

唯羡灵溪贤太守，一麾清坐似深山。

卷 835_32

【春末寄周琏】贯休

暮角含风雨气曛，寂寥莓翠上衣巾。
道情不向莺花薄，诗意自如天地春。
梦入乱峰仍履雪，吟看芳草只思人。
手中孤桂月中在，来听泉声莫厌烦。

卷 835_33

【读《吴越春秋》】贯休

犹来吴越尽须惭，背德违盟又信谗。
宰嚭一言终杀伍，大夫七事只须三。
功成献寿歌飘雪，谁爱扁舟水似蓝。
今日雄图又何在，野花香径鸟喃喃。

卷 835_34

【春游灵泉寺】贯休

水蹴危梁翠拥沙，钟声微径入深花。
嘴红润鸟啼芳草，头白山僧自扞茶。
松色摧残遭贼火，水声幽咽落人家。
因寻古迹空惆怅，满袖香风白日斜。

卷 835_35

【归东阳临岐上杜使君七首】贯休

小谢清高大谢才，圣君令泰此方来。
一从到后常无事，铃阁公庭满绿苔。
红锦帐中歌白雪，乌皮几畔抚青英。
不知何物为心地，赛却澄江彻底清。
谁报田中有黑虫，一家斋戒减仙容。
分忧若也皆如此，天下家家有剩春。
忧民心切出冲炎，禾稼如云喜气兼。
林下闲人亦何幸，也随旌旆到银尖。
方恐狱中桃树出，忽闻枯木却生烟。
褚祥为郡曾如此，却恐当时是偶然。
枯骨纵横遍水湄，尽收为冢碧参差。
分明为报精灵辈，好送旌旗到凤池。
舍鲁依刘一片云，好风吹去远纤尘。
犹期明月清风夜，来作西园第八人。

